

Radunanza generala dals 08-02-2014 a las 20.00 i'l Alveter ad Ardez

18 commembers sun preschaints, set s'han s-chüsats.

1. Bivgnaint e tscherna da duos scrutinadurs

Daniel salüda ils preschaints e preschainta las tractandas. El manaja cha cun usche üna gronda brajada nu dovra ningüns scrutinaduors, cha fin tant riva el eir be sulet da dombrar.

2. Il protocol da la radunanza generala da l'on passà vegn prelet ed aprovà.

3. Rapport dal president

El manzuna tuot ils termins cha la società ha gnü d'ürant l'on. Da la tschaina als 9 da favrer ingio ch'el d'eira magari sceptic pervi da la pulenta pero co chi s'ha muossà davopro sainza güstificaziun. A la radunanaza dals president a Tusan haja dat bler palperi süt ed üna sala freida. Quella d'eira almain s-chaudada sü Zernez a la radunanza dal district da chüra. La delegiada da giubieum a Scuol lauda el sco la meldra ch'el ha vis fin hoz. Als 29 da gün es mort nos camerad da chatscha Jon Domenig. Nus ans algordain d'el cun ün mumaint da quietezza.

Il president ingrazcha zuond a singuls per lur agüd pel Nadal i'l vaud ed a seis collegs da la suprastanza per la lauvr praistada ed as lamainta da la fich maigra partecipaziun al tir intern e pro la lavur da chüra.

4. Quint annual e rapport dals revisurs

Marcel, il chaschier declera tuot sia contabilità e cha nus hajan fat ün gudogn da 90.30 frs. Uschenas crescha il chapital da la società sün 51'883.87 frs.

Reto Strimer prelegia il rapport dals ravisurs chid es gnü fat als 21 da schner dal 2014. La radunanza segua il rapport dond dis-charg al chaschier ed a la suprastanza.

5. Fixar la cuntribuziun annuala

Daniel declera cha quist sarà l'ultim o il penultim on chid es amo uschè bunmarchà. El propuonna da restar culla cuntribuziun pro 75.- frs. La proposta vegn acceptada unanimamaing.

6. Rapport dal derschader

Mario Hässig quinta ch'eir l'on 2013 d'eira avantman pac interess per far lavus da chüra. Be tschinch annunzchas per trais termins previss. A quels ingrazcha el fich ed eir a Mirco ed a Niculin per lur lavur. Malgra chi d'eiran be duos candidats, e be tras quella lavur s'haja fat ün gudogn. I s'haja cumprà glüms per s-chatschar ils usöls our da la prada. I dovress pero amo agüdots d'ürant il temp da sgjar. Interessents dessan s'annunzchar pero Mario o pro Emil.

Emil interrompa il rapport admonind cha sch'in avegnir nu gnian eir commembers a lavur da chüra e na be candidats, schi cha lura gnian strichats ils pajamaints. I nu gaja da gudognar raps sainza far nöglia!

Mario continuescha cun seis rapport e finischa culs plects: „Pro la chatscha tocca eir la chüra.“

7. Mutaziuns ed onurificaziuns

La società ha uossa quatter veterans inplü. Nomnadamaing Jon Blank, Reto Franziscus, Primus Hartmann e Lüzi Stupan. N'ingün d'els es preschaint perquai tils gniran surdattas las medaglias la saira da la tschaina.

Il president prelegia üna charta ch'el ha survgni la saira dal Nadal da chatschaders da Gian Paul Priuli. El nu saja cuntaint cun la lavur da la suprastanza e perquai sorta el da la società.

Daniel es fich dischilus da quista charta. Mincha duos ouns vaina elecziuns. Avant co scriver ün tal chaschöl saja d'avair ballas e's metter a disposiziun per üna carica. Inplü as pudessa scriver la vardà e na tal chaschöl intuna Daniel.

Peider manaja eir chi manca ün pa il kit chi tegna insembel la società. Dis da chüra füssan l'ideal per chürar quella cumpagia. Ch'ei ad Ardez detta chatschaderuns e da quels chi gnian be miss d'vart. I discuoran a la maisa raduonda e sapchan tuot ma nu füssan a radunanza. El fà la prognosa ch'ün di saraja obligatoric da far custodi uschinà nu detta ningüna patenta. Nus stuvain muossar eir als na chatschaders cha chatscha nun es be coppar.

A Rico disturba tuot quist tamtam pervi ch'ün less sortir da la società. „Schün less ir dessal ir.“ Tenor el stuvessna svegliar l'interess per la società invezza da be perder comembers.

Arnold manaja cha ir po'l schon, pero na argumentar sia decisiun uschenas. Cha'l dret motiv saja para cha la tschaina nu saja quist on pro el. Cha Gian Paul haja pero eir gnü fingià duos jadas indavorouda la tschaina. El nu dessa far uossa uschenas. Ir po'l, pero cun manjera.

8. Orientaziun statüts dal nouv district IX

Marcel preschainta ils statüts. No nu tils stuvain aprovar, be tour in cogniziun. Daniel orientescha cha nossa società vess l'onur da surtour il presidi cun ün president our da nossa società. I füss puchà da laschar ir quist'onur our d'man. Scha nus nu furnin ün president saja la società Sarsura landervia. La suprastanza nu n'ha ningün favorit o candidat per quista carica. Heinz dumonda scha Marcel nu füss pront da's metter a disposiziun. El nu disch propcha da na, ma ch'el haja fich pac temp. Arnold dumonda a Reto Barbüda. La resposta es „na“. Daniel dumonda ad Arnold. El ha fingià massa bler ed eir amo famiglia. Sch'el dschess da schi gnissan paquetats ils coffers. Reto Filli nun es n'eir na pront fintant ch'el nu gaja a chatscha. Tenor Marcel nu fetscha pero prescha. No stuvain avoir ün pür in Avrigl. Tuots dessan tadlar intuorn e discutir cun ün o tschel e dar tras il resultat cun candidats pussibel a la suprastanza la saira da la tschaina.

Marcel ans maina tras ils statüts novs per nossa società. Quels statüts novs dovraina pervi da la restructuraziun dal BKPJV. I da diversas discussiun pero la fin finala raista tuot sco cha la suprastanza ha suotamis a la radunanaza. Ils statüts novs vegnan acceptats unanimamaing.

9. Elecziun d'ün candidat pel presidi district IX

Quella elecziun vegn spostada sün cur cha nus vain eir ün chi füss pront da far quai.

10. Orientaziuns

Als 21 da gün giubilescha la sacziun da Bravuogn seis 65avel anniversari. Als 26/27 avrigl es l'Agrischa sü Zernez. Per 10 francs l'ura as pudessa lavurar là sco voluntari per la gastronomia.

Peider manzuna chi s'haja problems cul program da tir. Pervi dals uraris ed il sulai s'haja üna fuolla ed ün puff cun chonnas in tuot las direcziuns e glied chi nu n'haja bler'idea da manipulaziuns da l'arma. Perchè nu's poja adattar noss temps da tir cun quel dal trat 300 meters. Quels tiran eir plü tard la saira ed han main problems cul

sulai. Cun l'obligatori da trar aint il schluppet daraja amo daplü travasch. Quia füssa da tour alch per mans. l'assessur scclarischa che chi's pudess far..

11. Varia

Suot varia vegna discutà animadamaing sur da la punctaziun da cornas. Cumanzà haja cun la remarcha da nos president cha chi chi detta giò las cornas massa tard nu survegn ningüna punctaziun, pero chi's possa eir dar giò las cornas be per tillas metter vi da la paraid per la sairada da la tschaina sainza cha las cornas stopchan gnir punctadas. Quist on sajan gnüdas dattas giò fich pacas cornas.

I's dauda votums cha la punctaziun metta in malura il kit da la società. Quista punctaziun procura adüna darcheu per discordias. Auters pretendan cha couscher oura las cornas e tillas dar per laschar punctar haja dachefar cun character. Inplü saja eir da resguardar ils donateurs da la tablas. Trofeas e verer chi chi ha il plü grond, il plü bel nu saja plü conform a la chatscha moderna. Stechs e lantschets hajan eir lur lö sün la paraid da trofeas ed hajan forsa plütöst merità üna medaglia co auters. Melder vi da la paraid co da tils laschar ir in malura. Schi's less laschar sainza punctaziun saja pero da decider in ün'otra radunanza.

Il capo d'Ardez, Jonpeider füss pront da tour las cornas cun el. El ha nempe planisà ün viadi culla barcha vers Passau. Uschennas es finida quista discussiun. El dvainta pero amo üna jada fich serius. Id haja dat uossa duos incendis in val Sampuoir dūrant il temp da chatscha. Quai haja cuostü al cumün duos jadas var 7'000 francs. Prossma jada fà il cumün tuot il pussibel per chattar il cuolpabel e farà plont cunter incuntschaint.

La presidenta serra la radunanza a las 23.00

L'actuar Armon Schlegel